

La Lettre Jèrriaise (14 Févri 2026)

Bouônjour, bouonnes gens. Ch'est Françouais L'Maistre
tch'a l'pliaîsi dé vouos présenter la Lettre Jèrriaise à matîn, Sanm'di lé 14 du mais
d'Févri 2026.

Ch'est la Saint Valentîn, aniet. J'pense qué lé jour est nommé auprès un soudard
tchi 'tait nommé Valentîn dans l'temps des Romains et lé jour fut célébré auve la fête
du 15 tchi 'tait lé c'menchement du R'nouvé pour les Romains.
Mais, ch'est pus tard qué v'là tchi d'vînt lé jour pour célébrer l'amiêtchi.

Mais ch'n'est pon seulement lé jour pour l'amiêtchi, chu jour, ch'est un jour qué
nou donne des présents. Et pis, l'amiêtchi n'est pon seulement l'amour. Dans
la Bibl'ye, dans la preunmié Lettre ès Corinthiens, nou liet qué l'amiêtchi est pâcient,
l'amiêtchi est bénîn. L'amiêtchi n'est pon jaloux, n' sé vante pon.

L'amiêtchi protège tréjous, est tréjous fiabl'ye ! Boustre, ch'est difficile
dé pouver suivre tout chenna dans la vie!

Mais, i'n'y' a pas d'doute qu'un tas d'monde éprouvent dé faithe dé lus mus à
suivre lé mandat d'la Bibl'ye, mais comme j'l'ai dit, ch'est difficile !!

Enfin, pour èrv'nîn au jour même et les traditions dé ches jours,
j'm'en rappelle bein qué des garçons dans
ma jannèche 'taient un mio mêchants et env'yaient des cartes ès hardelles tchi
n'taient pon auve un galant pour lus haler sus la gambe
et pour les faithe penser qué iun des garçons 'tait emmouothachi auve lyi !!

Ch'tait eune bordée d'fanne pour les garçons, mais gentiment
cruel pour la pouôrre fil'ye !

Ches jours, les garçons envyient ou donnent des flieurs ou eune boêtee
d'chucrîns ou du chocolat
et chenna est bouôn pour l'esprit, pour les hardelles et ch'est eune bouonne
chose pour les boutitchièrs en Jèrri et ailleurs !

J'espéthe qu'ous allez aver eune bouonne journée auve vos chièrs et
vos anmîns les pus près, et qu'i' y' étha tout pliein d'rêvillon pour touos vous.

Ayiz tous eune bouonne semaine. À bi.